

INUIT ATAQATIGIIT

Inatsisartuni



16. juli 2020

Inatsisartut Suleriaasianni § 37 imm. 1 naapertorlugu Naalakkersuisunut apeqqut imaattoq matumuuna saqqummiuppara.

Naalakkersuisunut apeqqut:

- 1. Inatsisartut 2019-imi ukiakkut ataatsimiinnerminni aalajangiiffigisaat imm. 131 pillugu killiffik pillugu Naalakkersuisut nassuiaaqquneqarput.**

Tassani Namminersorlutik Oqartussat ingerlataanni errorsinermut qaqorsaait aammalu kingunerutit taamaallaat avatangiisinut innarliisuunngitsunik nalunaaqutsikkanik aammalu tipigissaateqanngitsunik atuilernissaat pillugu Naalakkersuisut suliaqarnissamut peqquneqarput. Tamatuma ilutigisaanik inoqutigiinnut inuiaqatigiit errorsinermut qaqorsaatinik aammalu kingunerutit avatangiisinut innarliisinnaasunik atuinerisa millisinnissaat anguniarlugu Naalakkersuisut paasititsiniaanermik ingerlataqarnissaannik peqquneqarlutik.

(Inatsisartunut Ilaasortaq Sofia Geisler, Inuit Ataqatigiit)

Tungavilersuut:

Nunani Avannarliit kemikalianik avatangiisitsinnik innarliisinnaasunik unitsitsisinnaasunik peruiaatinik atuisuupput, nunatsinnili imermik kuutsittakkatsinnik peruiaasussanik saliivinnik pilersitsisoqarnikuunngilaq. Ullormiit ullormut errorsinitsigut imartatsinnut toqqaannartumik mingutsitsisunik aniatitsivugut, kingunerutit ilanngullugit kuutsitsiinnartarluta. Errorsinermut qaqorsaait aammalu kingunerutit kuuffikkut kuutsittakkagut tamarmik akuutissanik avatangiisitsinnut ajoqutaangaatsiarsinnaasunik akoqarput.

Ilorraap tungaanut alloriartoqassappat innuttaasut errorsissutinik kingunerutinillu avatangiisinut innarliinnginnissamik nalunaaqutserneqarsimanngitsuni atuiunnaarnissaat aniatitsiunnaarnissaallu pisariaqarpoq. Namminersorlutik Oqartussat tassani maligassiuissussaavoq, taamaattumik UKA2019/131-ip piviusunngortinniarnerni sulinerup sumut killinnera paasisaqarfigissallugu qilanaara.

Kissaatigivara apequtikka ullut sulffiusut qulit qaangiutinnginneranni
akineqarnissaat.